



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 7

PM Modi-i ajak dang climate change anema raratsü ayongzük

Imran Khan-i Eid sülen longkak aittsü sangdongogo



VOL. XX NO. 183 (ADOK 183) DIMAPUR AMUNGNÜ (SUNDAY)

RONGCHII (APRIL) 16, 2023

₹ 5.00

Sorkari NSF takhangba atema langzür

Dimapur, April 15, 2023 (TYO): Nagaland Staff Selection Board (NSSB) ajanga recruitment process tajung ka tenzüksü meranger anungji NSF, kaketshir teloktem, candidates aser tsüraburtemi tetsükdaksü magütsüi mapa inyaka odaktsütsü mepishir ta Nagaland sorkari tanü metetdaksü.

September 13, 2022 nü NSF-i Combined Staff Recruitment Examination 2022 nung viva-voce component atema mezüing ashishitep. Parnoki Personal Interview marks 12.5% aliba nungi 5% akümtsü takhangba agütsü.

Parnoki aiben iba takhangba nenshiba sülen Hokolbarnü Nagaland Chief Secretary dang interview maparen mokdangtsü indang shidi ka zülua liasü.

NSSB-i November 11 aser 12 anogotem mezüingbuba CSRE agi aser iba ya November 9,

2022 advertise asüba sülen agia liasü.

NSSB ya NSF dena sendaktepa alir ajak den asüngdangtepa tentetba lir aser tanga Recruitment Boards o Agencies inyakyim repranga teinyaktsütem latet ta tanü Personnel & Administrative Reforms Department, Nagaland-i sangdong ka nung ashi.

India nung state ajaki recruitment process nung viva-voce aser interviews ya tongtipang shilem ka ta züingshir. Tawa tu Supreme Court-ia Haryana Staff Selection Commission kübok recruitment process shia atema viva voce nung total marks 12.5% asütsü tetuyuba agütsüogo, ta P&AR department-isa ashi.

April 18, 2023 nungi NSSB ajanga advertise asüba mapa 630 atema interview maparen tenzüksü sentong lir.

Kohima village nung alirtemi GMS T. Khel ki tasen yanglutsü

Kohima, April 15, 2023 (TYO): Kohima village kübok Tsütuonuomia Khel nung alirtemi aser tesüiba kaketshirtem, staff aser temeimertemi multi-storeyed Government Middle School (GMS) ka yanglutsüogo.

Parnoki iba school ki yangluba nung Rs 1.55 crore tema tenla agütsü aser Rural Development Department nungi teyari agiba dak alaka School Education Department nungi mesüra tanga teyari kecha magi.

Tsütuonuomia Khel nung 1930s mapang iba school lapoka liasü aser February 1946 nung sorkari iba school agi. Iba mapang asür Lhoukuo Solo, asür Neisetso Suohu aser Khriezotuo-ü Belho nunger tesayurtem liasü.

Iba school ki kimung ya asür Zelhoulie Sekhose-i mulungsoa tenlaba liasü.

Government Primary School nungi GMS jenjang nung ajungketba aser ano modern technology o innovations nung ajemdaker school tajung ka nungdaker ta Tsütuonuomia Khel Council-i shisatet.

Iba jagi parnoki 2017 küm "Give Back to Society" mapatong shisatet aser iba ya 2021 küm Platinum Jubilee nung tenzük. Nübertem aser talisa iba school nung tesüiba mapang azüingertemi tarutsü pututem shisaliok jenjang tajungba

ngudaktsütsü nükjidong nung iba mapatong tenzük saka COVID-19 wara ajanga tetsükdaksü ajurua liasü.

"Tsütuonuomia Khel nung GMS tasenba nung Ground floor + 4 storeys lir aser Principal office, Staff room, Pantry/ Auditorium aser kaketshir 300-350 shi amentsü class rooms 14 lir. Iba mapatong ya Rs. 1.55 Crore endoka inyak" ta Construction Committee convenor Er Kelhousinyü Solo-i ashi.

GMS T. Khel tasen ya Honibarnü School Education Principal Director Thavaseelan K-i lapoktsü. Iba sentong nung MLA Dr Tsielhoutuo Rhutso, Nagaland Board of School Education chairperson Asano Sekhose aser tongti ketdangsur aika aden.

Iba school nung Class A nungi 8 tashi nung kaketshir 90 lir aser tesayur 20 lir.

"Loktii school ki tajung yanglutsüba atema tenüngsang agütsür. Iba ya Nagaland nung sorkar school tajungtiba lir" ta Principal Director Thavaseelan-i ashi.

School Management Committee (SMC) teyakyak aliba school temi mapa tajung aika inyaka arur, ta paisa ashi.

Iba sentong nung T Khel Council chairman K. Neibou Sekhose menden liasü aser pai Education department dang smart schools atema smart teachers asütsü atema training & exposure trips agitsü mepishi.

Nagaland nung tsünütetba süngmok Odisha-i bener yok



April 15, 2023 nü Agriculture Advisor Mhathung Yanthan-i Nagaland nungi Odisha-i Organic Ginger bener yokdang agiba noksa angur.

Dimapur, April 15, 2023 (TYO): Honibarnü Agriculture Advisor Mhathung Yanthan-i Dimapur nungi Odisha-i Organic Ginger bener yokogo.

Mozü mamshii tsünüba süngmok ya Wokhaland Organic Ginger Producer Company Limited ajanga shishilembar. Parnoki Mission of Organic Value Chain Development for North East Region (MOVCDNER) Phase III kübok iba mapa inyaker aser Department of Agriculture o Nagaland sorkar ajanga yarir.

Maneni, COLKS (Centre of learning, Knowledge, and Services) ajanga service provider teyari agütsür.

Tanü sentong nung Advisor Mhathung Yanthan-i aluyimertem yaritsü nangzük.

"Aluyimba wadang tsütsü khurettem koktettsüla aser tsüngsang-mopung melenshiba tayongzükbatem koktettsüla" ta pai ashi.

"Iba mapa tila ka ya tetenzüker südakjang aser tarutsü nung talur teimba asütsü. International aser national sectors nungi alinürtem nem asenoki agütsütsü renema atatsüla" ta Mhathung-isa ashi.

"Nagaland nung aluyimba wadang 70% lir aser iba tajangzük agia jhum cultivation ajanga mozü mamshii aika tsünüteter" ta Joseph Yanthan-i

ashi.

MOVCDNER nungi aluyimer 23000-i tajangzük nguogo aser inputs, technology o hand-to-hand holding of training agütsür, ta paisa ashi.

Takümsa ano shilem ka tenzüksü aser ibaji services provider asem- COLKS, Green caravan o Entrepreneurs Association teyari agia inyaktsü, ta paisa ashi.

Tang tashi nung yimtsüing 380 ayimjemogo aser tesüiba kümtem yimtsüing aika renloka aruba nguogo. Sen atema tsünütetba tsünüsenbongtsütemji ginger, turmeric, Naga king chili, brown rice amala liasü, ta Joseph-isa metetdaksü.

Phek nung contractors aser mapa inyakertemi NHIDCL anema lungkak ait

Kohima, April 15, 2023 (TYO): Kohima-Jessami two-lane road indang Package-V atema contractors aser staff noklang aikati Honibarnü lungkak aitogo aser parnok nem tagütsütsü aliba bills magütsüra May 1 nungi lenmang noktangtsü ta amokmerenogo.

"Kohima-Jessami two-lane road project indang Package-V ya Phek district kübok Chizami tsünglanglen nungi Lanye Bridge tashi lir aser 2021 küm tom ka nungi iba mapa tenzük" ta Stroyproekt LLC OIA JV atema local project coordinator A. Movi-i ashi.

Honibarnü local contractors dena nisung noklang aikati Stroyproekt LLC OIA JV indang office nung adenshi aser parnok nem agütsütsü aliba Rs 19 crore meshi.

Sen ya local contractors-i mapa inyakba aser ano parnok

company nung mapa inyaker nisung 120 indang taa dena lir.

Mapa kanga meiloni inyakba ajanga contract agienogo ta NHIDCL-i ashiba atema local contractors jashitep kechiyong iba mapa nung inyakertem ya local nisung 90% lir, ta Movi-isa ashi.

Lungkak aitertemi koltem raksatsütsü amokmerenba sülen Stroyproekt LLC OIA JV General Manager Kishore Vaishnav-i 19-Phek Assembly Constituency MLA Kuzholuzo Nienu nem osang sangoktsü aser pa tesem tonga arur lungkak aitertem songtem, ta Movi-isa metetdaksü.

MLA Nienu-i Hombarnü NHIDCL ketdangsurtem den jembitsü aser nungdak süra Delhi nung ketdangsurtem den jembiteptsü nangzük, ta paisa ashi.

MLA Nienu-isa local contractors aser mapa

inyakertem dang tensa meraksai atatsü mepishi.

Lungkak aitertemi MLA-i mepishiba agizük saka May 1 nungi lenmang noktangtsü sangoktsüogo. Iba ajanga Meluri aser iba temeket aliba tesemtemi gari senzüba nung timtem ajurutsü.

NHIDCL-i mapatong ajungbena anenba ajanga Contractors-i Gauhati High Court (GHC) Kohima Bench nung writ petition ka benokogo.

Package-V kübok bill tagütsütsü kecha mali aser mapang kanga agiba atema Corporation-i March 15 nü package agien ta NHIDCL ketdangsur kati ashi.

GHC Kohima Bench-i April 3 nü NHIDCL dang bids melapoktsü tetuyuba agütsüogo.

Okadakisa NHIDCL dang hopta pezü tsüingda telangzüba agütsütsü tuyuogo.

India-i tashiyim mashitsüla: Naga-American Council

Dimapur, April 15, 2023 (TYO): Naga nunger madak tashiyim agi India wako amshidaktsüba ya tim masüba inyakyim ka lir. Naga nungeri India dang onok wako agizükang ta ashiba den kasa lir ta Naga-American Council-i metetdaksü.

India sorkar atema o jembir AK Mishra-i NNPGs aser NSCN (IM) tanishirtem den yimjung olemtep aliba nung ajemdaker Naga-American Council-i iba osang ya Honibarnü metetdaksü.

"Naga wako ya sobaliba atema

dang ta onoki kodang mashi. Honorary President of Nagalim Dame Grace Collins-i Naga wako ya sobaliba indang ta kodanga mesangdong. Laisa telungpur telok ka den dang masü saka India aser Burma nung aliba Naga nunger ajak atema noktaker ta shiogo" ta Naga-American Council-i sangdong ka nung ashi.

Hokolbarü AK Mishra-i NSCN den ajurutepa jembidang item onüktem benoka jembia ta parnokisa ashi.

H.E. Dame Collins-i iba

tebilemstü onük atema tiyongtsü nung dang inyaka arur saka lai Naga wako dak küm 75 tashi Naga nungeri aginüa arubatem dena lir ta angateta lir, ta parnokisa metetdaksü.

Naga wako ya Naga nunger asoshi kanga tongtipang ta agizüksüla aser aria bilema yimjung olemtep alitsüla. Naga nunger taginüba agizükba ajanga kati ka akhümtsübutepstü aser sobaliba o maitsü balala telok ana tsüingda tesentaktep akangshitsü ta Naga-American Council-isa metetdaksü.

Khensa Students Union Kohima-i kaketshir asoshi camp ka ayongzük



Dimapur, Rongchii/April 15 (TYO): Khensa Students Union Kohima ajanga "The Future of Work" omen nung ajemdaker April 7-9, 2023 anogotem Jubilee Memorial Centre, Kohima nung camp ka ayongzük liasü, koba nung Khensatur Telongjem Kohima-i sponsor süa liasü.

Iba camp ya kaketshirtem asoshi asendenshi sentong ka ama liasü, kong parnoki tarutsü wadang asoshi pei sempet tali tejangjaba nung angkateta liasü.

Sensaksema aser maparen balala inyakba ajanga kaketshir temi mapa bushiba nung timtem aser maongka tali jangjateta liasü.

Iba sentong asemnü akadang takotet nisung pezüü onük balala nung ajemdaker jembia liasü.

Mezüngbuba nung Entrepreneurs Association tentetsang aser CEO Neichute Doulo-i social entrepreneurship indang jembia aser iba mapang, Naga nung civilization ya yimtsüing nung tenzük, anungji yangji rangloksü nüngdaker, ta pai ashi.

YouthNet, Education department nungi Pursungit Pongen-i tanü tensa nung mapa inyakba tesemtem nung soft skills nüngdakba indang jembia liasü aser education degree nungi alia angkateta aintsü ayongzük.

Dr. Aoakhum Kichu, Consultant, Department of Radiation Oncology, Eden Medical Center ajanga physical sciences, medicine, engineering aser technology tsütsü maongka balala aliba indang jembia liasü.

Iba sentong nung Kohima Ao Baptist Arogo nungi Pastor Arep Tzudir-i tanü Naga nung rongnung rongsen, lokti nung jenjang ase career dak sendakba konang aser maksü indang jembia liasü.

Tarutsü jenjang tajungba akumtsü asoshi iba tangateta melenshitsü pai lanurtem ajungmeso aser meimchir tenzüksü ajungshia liasü.

Ward 21 Welfare Committee ajanga Dimapur Police dang pelar

Dimapur, Rongchii/April 15 (TYO): Dimapur yimti tiyong nung ozüing alema lenmang nung shishilempar anendaktsütsü/mittsü asoshi Dimapur Police-i mera agitsü molungtetba atema pelar, ta Dimapur yimti kübok colony pezü (Middle Point Colony, Churches Colony, Notun Bosti, aser Nyamo Lotha Colony) loktepa aliba Ward 21 Welfare Committee ajanga sangdong ka nung ashi.

Tim ketdangsur temi talisa City Tower tesem nung balaka rangloksü nüngdaker, kechiaser yangi City Tower nungi Popular Bakery lemjem tashi nüburttem tetsüing agi jajatsü lenmang yuja alidak aonung menur chiyongtsü ayokba aser stall tem lapokba ajanga nüburttem nem timtem balala agütsür, ta Committee ajanga ashi.

Lanur temi pei takum alitsü asoshi meranga inyakba yimyatam amshia item chiyongtsü ayokba aser stall lapokba atema pelar, saka inyakyim kar junga reprangshitsü nüngdaker, talisa chiyongtsü ayokba, traffic ozüing,

item stall lapokba mapang, jana ketdangsuba, kidang-kiyonger asoshi mapetba, lokti menenmechiba inyakshangshi amala tekeratiba nungi ketdangsur temi reprangshimtsü nüngdaker, ta ashi.

Dimapur nung nüburttem tiptema alitsü asoshi taoba mapanga lenmang balala nungi mapang telatet makai anepbong tashi item chiyongtsü ayokba aser stall lapoktsü melaba ajanga timtem ajuruba civil administration, police aser municipal ketdangsur temi meteta lir.

Ano iba lenmang nung item food carts/stalls tem yimya shidak nung masü aser ozüing memelai ayuba ajanga traffic nung timtem kanga ajurur. Ammang nung item shishilempar temi pei kidangi aiba lenmangtem nung food carts mesüra stall yua lenmang nokdangba mechi kiyong nung alirtemi aiben ashishia aruogo. Iba ya nüburttemi tetsükdaktsü makai lenmang amshitsü aser senzütsü temeden anema lir, ta Committee ajanga ashi.

Anungji item tensa tia majurutsü mechi Committee ajanga ketdangsurtem dang lenmang bushitsü aser tsüinglangen agüja aliba atema ozüing takang yanglua amshinung ajak asoshi tajung asütsü ayongzük:

1. Chiyongtsü ayokba (food carts), stall aser danga shishilempaba tesem lapoktsü asoshi mapang telatet ayutsüla.
2. Lenmang mesümenangba nungi kumzüksü mesüra ajemtsü atema parking tesem balaka agütsütsüla.
3. Jana indokba ketdangtsütsüla.
4. Food safety aser public health.
5. Ozüing alema inyakshangshiba jangjatsüla.
6. Tetsüing agi senzürtem asoshi tetsükdaktsü mesüra timtem magütsütsüla.
7. Tetsüing lenmang nung talisa nikongdang nungtepba mapang Food stalls/carts temi tables aser chair tem ayutsü memelatsüla.



Eden Academy Mokokchung pur 'World Art Day' amungba den repsema inter-house tetoktepba sentong ka April 15, 2023 nü parnok school kilem nung ayongzük akaba mapang tangokba noksa nung angur. Iba sentong nung Grade I-X kaketshir ajaki tejangraba tulu nung shilem agia liasü. Iba sentong nung Dimapur nungi freelance artist Pangeronen Aier tetushi tesemdanger ka ama arua pai environmental art tongtibang indang lemsatep. Pangeronen ya Lalit Kala Akademi, New Delhi-i tenüing atetba (recognized) asüba nübu ka lir aser pa indang mapatemji nüngtugu Modern Art Gallery, New Delhi aser British Council London nunga sayuogo. Mokokchung, 15th April, 2023

CM Rio-i Cheno Konyak asükhu lemsatep

Dimapur, Rongchii/April 15 (TYO): Minister, Forest, Environment & Cilmate Change and Village Guards, C.L. John tebu Cheno Konyak temoatsü arishi küm 105 tashi lir April 14, 2023 nü asüba osang angashia temolung shiranga jashir, ta Nagaland Chief Minister Neiphiu Rio-i sangdong ka nung ashi.

Cheno Konyak ya ochi molungsentü aser temolung tulu aliba nisung ka liasü, shibai arishi tepiyong nübür ajungshi asoshi mezüing sür inyaka aru ta angazüka temolung nung kongshir.

Pa ya lokti nung temelenshi bena arutsür nisung ka liasü aser pai lokti nung temenen anema rara. Iba yongji pai par tanurtem dang ajemalua dangar dang

meimtsü aser pei agitsü kisting mebilemi alitsü sayu, ta Rio-i ashi.

Pa asüba ya Konyak nung asoshi longzük aser tebu tajung ka samaogo. Pa asüba ajanga tawa adokba asüngtsü tasak asütsü. Tanü pa asen den maliba asoshi jashir, saka pai mapa tajung inyakba bilemteta asenok pelar. Asür dang tepela sayua asenoki Tsüingrem tenüing sangdi, ta pai ashi.

Mangyim mapang ni aser ozü kibongi mangyimer kibong den asükhu lemsatep. Tulusang Tsüingremi nenok nem anisüngzük aser tashi agüjang ta sarasademtsür. Asür tanüla teti tatem maka tesunep nung anisüngzükjangma, ta CM Rio-isa ashi.

DTO Dimapur-i National Clean Air sentong atema awareness agütsü



Dimapur, Rongchii/April 15 (TYO): Nagaland Pollution Control Board sentong kübok Dimapur District Transport office ajanga National Clean Air programme indang it aka asoshi awareness sentong tenzükogo.

Iba awareness sentong ya April 15, 2023 nü Dimapur aser Chumoukedima kübok tongtipang tesemtem nung DTO Dimapur, D. Jambo lenisüba kübok tenzük liasü.

Iba campaign mapang ketdangsur temi gari nungi mokozü adokba ajanga mopung

menentsüba indang osangtem prokshia liasü.

Gari ajanga mopung menentsüba ajemdaktsütsü asoshi inyaktsü aser meinyaktsü yimyatam sayuba den külemi gari amshir nem paper flyers tem lema agüja liasü.

Ketdangsur temi gari amshirtem asoshi seminar tatsüka ayongzük agi aser campaign mapang Carbon dioxide (CO2), hydrocarbons (Hc), carbon monoxide (Co), aser oxide of nitrogen (Nox) amala angati tendanga liasü.

Dept. of School Education-i OoSC tenüing bendentsü ayongzük

Dimapur, Rongchii/April 15 (TYO): Out of School Children (OoSC) tem züingoktsü asoshi maneni inyakba nung shilem ka ama Department of School Education, Nagaland ajanga NGOs, Municipal/Town/Village Councils, Churches, Student Unions aser nüburttem dang arishi küm 6 nungi 16 tsüingta tanur school mazünger mesüra secondary education mongui school yutsür alirtem tenüing tejangja bendentsü ayongzükogo.

Anasa aliba Government Schools/National Open School tem nung OsSC nem training balaka agütsütsü asoshi Department ajanga sentong yanglutsü atema DoSE, Nagaland Online Education Services Portal <https://dosenl.inso> nung link agüja aliba Google Form nung item tanurtem tenüing bendena agütsütsü ayongzük, ta Department of School Education sangdong ka ajanga ashi.

Mokokchung nung World Art Day mungogo

Dimapur, Rongchii/April 15 (TYO): Creative Hearts ajanga Jubilee Memorial College Art aser Photography Club den lungjemer World Art Day bilemteta painting competition aser art exhibition sentong ka April 15, 2023 nü Jubilee Memorial College, Mokokchung nung ayongzük liasü.

Painting competition nung nisung 48 arua shilem agi, koba

telok asem, Category I - Class 5 nungi Class 8, Category II - Class 9 nungi 12 aser Category III - Open Category (College students aser arishi küm 19 nungi tema) lemsar ayongzük liasü.

Iba tetoktepba nung takok angur nem sempet agütsüba mapang Dr. Imtiwati Jamir, Principal, JMC ajanga kaketshir ayongzük liasü.



April 15, 2023 nü Washington D.C. nung India Union Finance Minister, Nirmala Sitharaman (ajichilen nungi mezüngbuba) 'India's Digital Public Infrastructure - Stacking Up the Benefits' seminar nung adenba noksa nung angur.

PM Modi-i ajak dang climate change anema raratsü ayongzük

Washington, Rongchii/April 15 (Agencies): Ato kilonser, Narendra Modi-i nüburtem dang climate change anema shilem agitsü aser iba tebilemsü atema longjemer raratsü ayongzük.

Hokolbarnü linük balala nungi lenirtem den jembidang Modi-i, anogo shia tilateri inyakba nung tashi lir, ta nüburtemi angatetra ibaji ajanga alima tzü-mopung kümzüka ayuba nung ajaki tongti shilem agitetsü, ta ashi.

World Bank-i ayongzükba "Making it Personal: How behavioral change can tackle climate change" conference nung jembidang Modi-i, "Alima tesem ajaklen nisungtemi climate change indang osang aika angashir. Nisung aikati iba atemaji tsübuu bilemer, kechiyong iba tebilemsü atema parnoki kechi inyaksülar memetet. Iba tebilemsü atema sorkar mesüra alima nung tentet balalai inyaksüla ta parnoki

bilemer. Parnok teinyaktsü shilem-a lir ta parnoki metetra parnokia shilem agitetsü," ta ashi.

Yaküm October ita nung Ato kilonser Modi aser UN Secretary General nati tenzüksüba "Mission Life" tetshia Modi-i, iba programme ya climate change anema democratic inyakyim ajanga raratsü asoshi lir, ta ashi.

"Climate change anema senden amenba langbang nung dang raratsü makok. Iba anema kibong ajunga nung chiyungba langbang nungi raratsüla," ta pai ashi.

"O lemtepa langbang ka nung tangatetba kaji chiyungba langbangi ora ibaji ajaki shilem agitetba mapatong ka kümdaktsür. Koba ajanga kibong ajak aser nisung ajaki alima kümzüksü atema shilem agitetsü," ta pai ashi.

"Testüba küm ishika tsüngda nüburtemi shilem agiba ajanga

India tesem aika nung 'sex-ratio' tajungba kümogo. Ayongtem merüktetba, tzüyiküm merüktetba mesüra lenmang merüktetba-a nüburtem ajanga liasü. Lokti aliba tesemtem merüka ayutsü atema parnoki inyaker aser LED bulb amshi tenzükbaji-a nüburtem ajanga lir. India nung LED bulb million 370 jungnüa yokogo," ta pai metetdaktsü.

"Mission Life kübok onoki lenla aika nung inyaker, aser item rongnung tzü kümzüka, energy kümzüka, jana aser e-wastes ajemba, anema alitsüsa libaliro melenshiba, mozü mamshii aluyimba aser menjang ajungkettsüba densema lir," ta pai ashi.

Ibaji ajanga 2030 küm tashi nungbo energy unit billion 22 dak tema kümzüksü, tzü litre trillion 9 kümzüksü, jana million ton 375 agi tajemba akümtsü aser e-waste ton million 1 shi ajemtsü, ta Modi-i metetdaktsü.

Indian Embassy-i Sudan nung sensotem dang kümküma alitsü metetdaktsü

Khartoum, April 15 (Agencies): Tang Sudan linük nung army aser paramilitary sepaitem tsüngda rara adoka aliba mapang nung Sudan linük nung aliba Indian Embassy-i India sensotem dang kidang nungi ayazüka maotsü tekümdangtsü metetdaktsüogo.

Honibarnü Indian Embassy-i twitter ajanga, "Khatetpa aser raraba osangtem angashia India nung er ajak dang kanga kümdanga alitsü metetdaktsüür, kidang nungi mayazüktsüla aser kanga kümküma alitsüla. Yimlibilema taoksa aser osangtsüsang metetpelaa liang," ta metetdaktsü.

Honibarnep Khartoum kübok tesem aika nung sepaitem telok balala tsüngda rara adoka injang ola den bomb ola angashia liasü.

Yimti nung aliba International airport nung sepaitemi mita repringba, kanga tongtibang lenmangtem


nung checkpoints amenokba aser nisung aliba tesemtem mita aoba video aika social media nung prokshio.

Kasa mapang nungji prangpong ola-a angashir.

General Abdel Fattah al-Burhan leniba nung Sudan Army aser Lt Gen Mohamed Hamdan-i aniba Rapid Support Forces na tsüngda tesüiba hopta aika mangatetep adoka aruba sülen Honibarnep parnok tsüngda rara tenzüko.

Rapid Support Forces-i sangdong ka ajanga, Sudan Army temi mezüng Soba nung parnok camp amak, ta metetdaktsü.

Sepaitemi sorkar atsüngdokba sülen ita 18 shi lir parnoki tan ita civilian-i aniba sorkar nem tashi agütsütsü ta metetdakja liasü, ajisüka General al-Burhan aser General Hamdan na tsüngda mangatetep adokba sülen tang rara tenzüko.



Bengaluru, April 15, 2023: Karnataka nung Assembly elections agitsü mapang ana nung lia Honibarnü Bengaluru nung Karnataka unit JD(S) Tir, HD Kumaraswamy (abelen) aser taoba mapang Ato kilonser, H.D. Deve Gowda nati party manifesto sayadang tangokba noksa nung angur.

Bihar state nung yi nung miim jemsemba agi nisung 20 asü

Patna, April 15 (Agencies): Bihar kübok Motihari district nung yi nung miim jemsemba ajanga Hokolbar aonung nungi Honibar nikongdang tashi nung nisung 20 süogo.

Police-i ashiba agi, Lakshmipur yimdak, Harsiddhi, Paharpur aser Sugauli areas nung yi nung miim jemsemba agi nisung 20 asü.

Osang angazükba agi, truck-tank ka nung miim densema

aliba yiji Motihari district-i bener aruba sülen yi ayokertem nem lemshia agüja liasü.

Bihar nung Excise Act kübok yi yangluba, pongdang nung yi azüba, yi lemshiba, yi belenshiba, yi bendenba, ayokba mesüra alizükba memelar. 2016 küm nungi state sorkari yi nokdanga liasü.

Prohibition Minister, Sunil Kumar-i, "IPC mesüra CrPC kübok ozüng alema aibelener

(yi jemer) ka nem senotsü teyari magütsür. Bihar nung yi tapu kecha majemtsü ozüng ajanga nokdanga lir," ta metetdaktsü.

Yaküm December ita nung Bihar kübok Saran aser Siwan district na nung yi nung miim jemsemba ajanga nisung 77 asü, saka state sorkari iba tatalokba nung nisung 42 dang asü, ta sangdongba atema National Human Rights Commission (NHRC)-i ketdangsertem aija liasü.

JD(S)-i mashisa tetsür shia nem sen 36,000 agütsütsü nangzük

Bengaluru, April 15 (Agencies): Karnataka nung Assembly elections agitsü mapang ana nung lia Honibarnü Bengaluru nung taoba mapang Ato kilonser aser JD(S) lenir, H.D. Deve Gowda-i party manifesto saya aser manifesto nungji parnoki tenangzükba onük 12 agüja lir.

Manifestor sayaba sentong nungji taoba mapang chief minister aser Karnataka unit JD(S) Tir, HD Kumaraswamy densema lenirtem aika liasü

Manifesto ajanga party-i Stree Shakti Groups-i agia aliba loan sentsüh atoktsü, küm shia LPG cylinder pongungu (5) angati agütsütsü, mashisa alir tetsür shia nem ita trok tashi ita shia sen 6,000 (ajak senteper sen 36,000) agütsütsü, amitsür nem tang ita shia pension sen 900 agüja aliba nungi sen 2,500 agütsütsü aser sorkar mapa tenzüka nung küm 15 abensar alirtem nem pension agütsütsü nangzükba lir.

Party manifesto nungsa aluyimertem nem ali acre shia

sen 10,000 subsidy agütsütsü, alu nung aayanger shia nem ita shia allowance sen 2,000 agütsütsü, aluyimer lanur den kibong akümer tetsür shia nem sen lakh 2 subsidy agütsütsü, Centre sorkar dang civil services aser defence recruitments tatidang balala 'Kannada' oshi nung agitsü atema akhangtsü aser nija sector nung Karnataka nung nem menden wazüka yutsütsü atema ozüng benoktsü nangzük.

Election nung takok ngura JD(S)-i sorkar college balala nung azünger tetsür 60,000 nem cycle aser EV Mopeds cycle lakh 6.8 agütsütsü aser district shia nung multi-speciality hospital amenoktsütsü nangzükogo.

Karnataka assembly election atema JD(S)-i candidate 142 sangdongogo aser maneni menden 82 atema candidates sangdongtsü.

Karnataka nung menden 224 aliba Assembly elections May 10 nü agitsü aser May 13 nü votes zünga election agiba osang sangdongtsü.



Panaji (Goa), April 15, 2023: Panaji nung ayongzükba G20 Health Meeting nung adentsü atema International delegates aruba mapang tangokba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, RONGCHII (APRIL) 16, 2023

Tesünep nung lidi

Asenok tesünep nung alitsüba ya Yisu shia arur külen asen nem mezüng agütsüba tashi aser temoatsü lir. Yisui kodanga Pa nütsüngtem dang nenok kodanga meshirangtsü aser kodanga lendong timtem majurutsü ta mashi saka meyiper Mathi 10:16 nungbo Pai nütsüngtem dang "Tsünütem rongi santem yoker ama ni nenok yoker," ta ashiba angur, Aji oda, Yisu shia arur Pa kotaki meyipa matudang, Pa nütsüng Peter dang, "nai ni meimer asü?" ta asemben tashi asüngdangba tatalokba ka asenok Yohan 21 nung angur. Tetezüji, Tsüngrem temeim osang tajung sangdonga jajaba mapang reshikangshi aser lendong timtem atalokyonga nai ni medoktsüi meimtsü südi (?) ta asüngdangba ta angatetter. Tetezüji, Khristan akümba tajanzükji taküm nung lendong timtem majurutsü ta masü saka kechikoma tia ka ajurudir ajuruaka asenok mulungjang nung tesünep alitsü. Atangji, mozü ya shiranger atema yanglu ama tesünep ya timtem lendong aser shisabolu ajururtem asoshi yangluba mozü lir. Ajisüaka, iba tesünep yabo sen agi alitsü makok mesüra alima jenjang tulu nung aliba agia mangutsü. Iba tesünep yabo Yisui dang agütsür. Iba tesünep aliba agi Yisu nütsüngtem Stefan-a dena tasütsüa metsümbui Yisu Khristai agütsüba temeim kulisüa jajaba asenoki tenyartem kaket nung azünger. Yisui asenok nem tesünep agütsüba alima nung timtem shisabolu akoktsü asoshi yutsüba hadir ka lir. Atangji, iba lima nung shibabo kecha shisabolu mali? Tanü putu nung balaka asenok nisung shia pei pei yari shisabolu lir. Ashiko, karbo yimten, arogo aser lokti khuret agi, karbo pei kibong khuret, karbo pei apuani aser tanurten khuret, ano kar atemabo pei tsürabur khuret, ano karbo makamaitba khuret, karbo sentsü maotet shisaboluba khuret aser ano karbo balaluluba khuret agi amuia moutet aser pei kidanga junga melitetsüsa akümba shisabolu khuret alitsüa akok. Item ajakji asenok shi aser tokolok dang masü saka tanüla nung shirangba tashidaktem lir. Item shisabolu khuretji nisungtem nungi pilaa aliba agia majungtsü, jenshia jajaba agia makoktsü mesüra ken o katepba agi shisaboluji manentsü. Anungji, item shisabolu khuret atema Laishibai mozü ka agüja lir. Ibaji asenoki Filipi 4: 6-7 nung shia angur. Iba Lai o agi ashir, "nenok kecha atema shisabulua telima saka tensa tia ajak nung Sarasadamba, Mepishiba aser Tenüngsang agütsüba agi Tsüngrem dang Mepishiang, aser Tsüngrem TESÜNEP kobai tangatetba ajak atendanger, iba jagi Yisu Khrista nung nü mulungjang aser nü kolok nüka alitsü." Atangji, alima nung shisabulutsü aika lir, anungji shisabulua teli ta kisüng ashiba agibo majungtsü. Iba jagi yangi tenyar Paul-i Filipi nung alirtem dang shisamebului tesünep nung alitsü atema tebu Tsüngrem dang ashitsüla ta ajungshir. Tsüngremi agütsüba tesünep nung asenok taküm alitsüba shisabolu aser timtem malidak alitsüba tesayuba ka masü, mesüra asenokbo kenyongi timtem majuru ayongayonga alitsü atema sarasademang ta ashirba masü. Ajisüaka, asenok shisabolu mapang tesünep angutsü atema kechi inyaksüla ta Paul-i asenok nema angatetdaksüner. Atangji, sarasadembaji asenok taginüba Tsüngrem dang meshia sarasadamba, ajibo asenok aikati inyaker. Ajisüaka, yangi Filipi tapu 4 nung ashiba yabo, shisabolu timtem nung alidang tesünep meshia sarasadem dangjia Tsüngrem nem tenüngsang agüja sarasademtsüla ta ashir. Ibaji asenok aika asoshi tasak asütsü. Aiben asenoki Tsüngrem dang 'Solution' dang meshir aser onsara timtemer asünungji tenüngsang agütsüsbajibo tensa den mapet amai bilemer. Ajisüaka, shisabolu ajurubaji asen taküm aliba ajanga lir, aji koda? Asen meketa tzu mopong, süngdonglidong aser anüng petinutem yanglubatem indang ya koda? Itemji kodang züngdangdir asen shisaboluba dang nungjibo Tsüngremi asen moatsüba temoatsütem teimba züngdangtettsü aser asen shisabolu dang nungjibo Tsüngrem ain aser taohiji kanga agia tuluba ta asenoki angatettsü. Daneil-i pa mulungsangzü kanglai aitsü ta temetet dang liasü. Iba ama tensa mapang ka nunga pai Tsüngrem nem tenüngsang agüja sarasadamba asenoki Daniel 6:10 nung shia angur. Iba tesünepji koda? Tesünep ya tamajung mapatem matalokba indang ashir masü saka tangari asenok dak tamajung inyakaka jashia mebilemba mulungsentü, tangari asen indang tamajung jembitsüaka asenibo tajung dang bilemba kolok indang ashir. Iba Tesünepji Tsüngrem dang tenüngsang agüja sarasadamba agi angur. Ashiko, asenok rongnunga karbo Tsüngrem o jembir saka tesünep mangur, sarasademer saka tesünep mali. Kidang ajak lir saka tesünep mali ta lia alitsüa akok. Item purtem asoshi Tsüngrem dang tenüngsang agüja sarasadema mepishiang ta Lai o agi ashir. Tesünep lira Cancer agi shirangyonga shisamebulutsü, tesünep lira tamakok, takoksa aser tesama anguyonga shisamebului "Kü den ya junga lir," ta dang tena Tsüngrem tenüng asangtsü.

OLEMSABANG

TSÜNGREM LARTEM TENZÜKBA WADANG NUNG TATIDANG SANG JENTI LIR

~ L. Kika Pongener.

Tanü alima kanga küra-a tejakleni aoba putu ka nung asenok alir. Iba ama putu ka nung Tsüngrem lar/Tsüngrem tenzükertema alima den jangyu medema lia aodang, memeteti mashileni aotsüsa tatidang sang jenti lir. Anungji item tatidang sang nungji metsüktsüsa kanga kümdanga saksalema tenzüktsüla. Yisu Khrista iba alimai arur tebu nungloksüba 'Mission' mapa tenzüktsü apusodang, pa-a temenen tanelai atidang. Asenoki laishiba nung Yisu Khrista atidangbaji reprangdangra, lung agi amtsük kümdaktsütsü atidang. Aser iba atidangbaji pa anogo lir-nu tashi lumia yaseta aliba mapang ka nung atidang. Ano temenen tanelai Yisu tenlaki kilem kolak kati anir atu, aser iba nungjagi tsükang, aser nebui kotak Tenyar aika yoka ne tsüng lung nung memetsütsü asoshi parnok kapu nung na ajungkettsü ta atidang. Ano temenen tanelai Yisu tenem talang kati anir atu, aser alima chuba yimli aser item sentsüwangshi sayu, aser nai ni aputaka külemra, ni ne nem alima yimli aser sentsüwangshi ajak agütsütsü ta atidang (Mathi-4:1-10). Ano tatemsa, Yisui tebu nungloksüba 'Mission' mapa ajak tempanger, pa taküm kangki nung tenla agütsütsüba mapang atongdang...Kangki takü marokji mejemi paitoktsü atema tatidang ka aru. Saka Yisui, "Saka ni mulungba ama masü nai mulungba ama suang" ta ashi (Mathi-26:39). Yisu Khrista tebu iba alimai yokba 'Mission'-ji mimchir temenen nungi alanzüktsü asoshi kangki nung pa temang rangben tenla agütsütsüba atema dang yok. Anungji kangki majangai Yisu Khrista Mission-ji tabensa masü. Ajisüaka, iba kangki takü marokji paitoktsü atema Yisu-a atidang sudi ta shisadanger. Aji oda, temenen tanelai lenmang balala agi atitang-aka Yisu Khristai item tatidangba ajunga nungji takok angu.

Tanü asenok Yisu Khrista dak amangertema anogo shia asenok meküta tatidangba sang jenti lir. Talisa, Tsüngrem lar/Tsüngrem tenzükertema Yisu atidangba ama anogo shia atidangtsü. Yisu Khrista lumia yaseta aliba mapang lung agi amtsük kümdaktsütsüba atidangba amaji...Kanga anungakonga tim-atemba mapang, senotsü kanga nungdaka aginuba mapang kar nung, asen meyong masüba sen/rongsen, kar asen meyong ama kümer mela-mela agitetsüsa lenmang kar agi atidangtsü akok. Mesüra asen nem ketdangtsü nungloksüba mapa kar nung ochimashi inyaka, mela-mela tajanzük agitetsüsa lenmang sadem-sadema angutsü akok, saka item ajakji tatidang sang (Temptation) ta metettsüla, aser item tatidangji akoktsüla. Ano Yisu dang iba tenlaki kilem kolak nungi tsükang, saka ne tsüng lung nung memetsüdaktsütsü asoshi kodak tenyartemi na kümzüktsü ta atidangba ama...Asen tenzükba arogo/wadang nung asen tepo akümer/ningiter (Supporter) nung-nubu aika alitsü akok, aser aseni kechi inyaknur iba amaji sadem-sadema inyaktetsüsa tensa tia-a ajurutsü akok. Iba ama mapang nungji, aikati Tsüngrem ama-adoker, aser pei taginuba/pei mulungba ama sadem-sadema inyaktü meranger, saka iba ya-a tatidanga ta meteta itemji koktettsüla. Ano Yisu dang temenen tanelai nai aputaka ni külemra, item chuba yimli aser sentsüwangshi ajak ne nem agütsütsü ta atidangba ama, asen tenzükba yimtsüng/jila nung sentsü aketer, taka-taiter, tashi-tawar, yimso-yimlir kar dang tebu jar, parnok dak atsükoker, parnok aküm nung, parnoki tuyuba (Directive) nung hai-haura ka-a, tashi anga-a tenzükra, asen nungdakba ajunga peria ngua, jenjang tajung nung sadok-sadoka jangradema küm aika tenzüka alitsüsa maangka angutsü akok, saka item ajakji tatidanga ta meteta itemji koktettsüla. Ano Yisui kangki takü marok mejemi paitoktsü asoshi tebu dang asüngdangtsü mulungtetba...ashiko, Yisu atema-a iba ya tatidangba sang ka liasü sudi, iba amaji tenzükba wadang nung timtem, shisabolu, tatala, mezüngmeshi, makamait, khuret balala ajurudang, Tsüngrem danga rasa-a jashitsüsa tensa tia ajurutsü akok, saka item ajakji tatidang sanga ta meteta itemji koktettsüla.

Aji oda, tanü putu nung Tsüngrem lar/Tsüngrem tenzükertema tatidangba sang jenti agi mekütbanga lir. Anungji item tatitangji koktettsü asoshi teti kümdanga, saksalema alitsüla. Tsüngrem tenzükertem atema tatidang sang tamajungtiba kaji, arogopurtemi tashimait kar ajitetra, ibaji tuteta metongshitsütsü melen junger-junger ta asangba ya asütsü. "Jataka asangba tebangmechi aser temulung ana tener parnoki jembir" (T.Ken-12:2). "Temeli agi mesüzüka nanga jembir dang nungi nisung artsüri tesulen maangka tali angutsü" (A.Shin-28:23). Shirnoki anemsa medeni indang-indanga metongshitsür parnoki tesulen maangka tali angutsü. Aji oda, Tsüngrem tenzükter dak asüyongjia tashimait kar ajitetra ajibo indang-indanga metongshitsütsüla. Tsüngrem tenzükter/Tsüngrem lar ajaki pei tenzükba arogo inyakyim, aser pei nem nungloksüba wadang/sentong ajak nung hai-haura kaa, tashi angaa, ajemalua tila kümer anidaktetsüla. Kanga tesusatsüka, Tsüngrem tenzükertema karbo shitakba pei ajaba wadang dang nungjibo, rongsen ketdangsuba mapa nungang tali tenuk yoka, tali temulung agüja inyaktü jangraba-a alitsü akok. Aji oda, Tsüngrem lar/Tsüngrem tenzükter ka atema ibaji tatidang sanga ta angateta iba nungjagi pila-a alitsüla. Aji oda, Tsüngrem tenzükter kaji arogo inyakyim aser sentong ajak nung tashi anga-a anidaktetba aser litetba taküm asütsüla. Tsüngrem lar kaji tensa tia ajak den liromedema litetba taküm asütsüla.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Khristanem anema inyakba atema India Tiri tebilemstsü akar



April 13, 2023 nü New Delhi nung Khristan lenirtem telok kati India Tir, Droupadi Murmu (abelen nungi pezübuba) ajurudang tangokba noksa nung angur.

New Delhi, Rongchii/April 15 (Agencies): India Tir, Droupadi Murmu-i linük nung Khristanem anema inyakba kanga bulua akümba atema tebilemstsü katsüba lemsatep, aser lai Khristan lenirtem dang linük nung temaba menden nung amener ka ama lai iba tebilemstsü onük reprangtsü, ta nangzüka liasü.

April 13 nü Murmu-i Rashtrapati Bhawan, New Delhi nung Khristan lenirtem telok ka agizüka senden mena liasü. Khristan lenirtemji Delhi nung Archbishop, Anil Joseph Couto leniba nung Methodist Bishop Subodh Mondal, Protestant Bishop Paul Swarup aser Khristan temeden atema inyaker ana- Michael Williams aser Tehmina Arora nung liasü.

Minute 30 shi senden amenba mapang nung Khristan lenirtemi Tir dang linük nung, talisa Uttar Pradesh aser Chhattisgarh state na nung Khristanem anema inyakba kanga bulua kümogo, ta metetdaksü.

Murmu-i, Khristanem anema inyakba osangtem lai züngogo, ajisüaka item tatalokbaji nisung tamajunger kari dang inyaker ta lai bilema liasü, ta ashi.

Tir, Murmu-isa linük nung Khristanem healthcare aser shisaliok jenjang ajungkettsüba

nung shilem tajung agiba atema pelaba lemsatep.

Laisa Odisha state nung lai 'nun' tem den yaritepa inyakba aser 1999 küm Odisha nung Australia nung missionary, Graham Staines den par jabaso ana gari nung rongseta südaksüba bilemteta jembi.

Laisa, missionary Graham Staines ya lar kiyonger liasü, ajisüaka iba mapang nungji (1999) iba lendong nokdangtetsüsa lai kecha meinyaktetba atema sasaba lemsatepa liasü.

United Christian Forum (UCF) report ajanga 2022 küm India kübok state 21 nung Khristanem anema inyakba tatalokba 598 liasü, ta metetdaksü. Khristan lenirtemi Tir nem agütsüba temepishiba shidi nungji iba report jia metetdakja lir.

Taküm küm tenzüker mezüngbuba ita asem (January, February & March) nung India nung Khristanem anema inyakba tatalokba 187 liasü, ta UCF-i metetdaksü.

Khristanem anema inyakba tatalokbatemji, Anti-conversion ozüng kübok tiyazü nung Khristanem nem tai tongloktsüba, Khristanem amokmerenba, Khristanem dak azükba, Tenla kitem bendoktsüba, tetsür dak tim

mesüi benshiba, Khristanem loktiliba/yimtsüng nung jendokba aser tasü mang ali nung meremdaksüba densema lir.

Talisa Uttar Pradesh, Chhattisgarh, Madhya Pradesh, Tamil Nadu, Uttarakhand, Karnataka aser Jharkhand state tem nung Khristanem anema inyakba tatalokba aika lir.

Tir nem agütsüba shidi nungjisa, tawa Chhattisgarh state kübok Bastar region nung tribal nütsüng aika aliba tesemtem nung Khristanem amakba osang metetdakja lir.

Tir nem agütsüba temepishiba shidi ajanga Centre aser state sorkartem dang linük temzüng kübok Khristanem temeden kümzüka ayutsü, yimsü benshitsü atema temeden agütsütsü, taküm akhüm keta litettsü, Khristanem kiojen aser taküm kümzüksü aser tribal Khristanem anema inyakba nokdangtsü mepishia lir.

Kasa temepoishiba shidi ajanga linük nung bendoktsüba Tenla kitem tanaben yanglushitsü melatsü, aibelenertem nem temerenshi agütsütsü aser tiyazü nung tai tongloktsüba ajanga takoksa angur Khristanem nem teyari agütsütsü mepishia lir.

ANOGO ABEN TSÜNGREM DEN

KECHI AGI TSÜNGREM PELADAKTSÜR

"Idangji shitakba tenlatem, tarungba aser rangben tarungba tenla nai pelatsü". T.Ken 51:19.

Asen sasa pela-a alitsü akok. Asenoki tangara peladaksütsü akok. Saka iba dang taoba asenoki Tsüngrem peladaksütsüla.

Dawidi pa temenen nangzüka pa sarasadem atem. "Idangii temeshiba tanela nung, tarungba aser rangben tarungba tenla nung nai pelatsü (T. KEN 19). Aseni inyakba ajak agi Kibuba peladaksütsüla.

A.W. Tozeri ashi, "Tsüngrem den aotsü tasak masü". Aji ochi.

Kenü Dawidi ashi, "Ni Kibuba ket nung tsükdi, ... saka ni nisung [ket nung tetsükdaksü." (2 Sam. 24:14).

Tsüngremi asenok metet, meimer aser aremzüker. Pa sentong ajak asenok ajungtsü, pelatsü aser pa sentsüwangshi asoshi lir. Anungji kechi agi Pa kanga peladaksür? Tashi angaa jajaba, tarungba tenla masü. Dawidi ashi, "Temulung meyipa medeni ni tarungba tenla bener arura, nai magizüksü.

Iba ken Dawidi jangratemtsü ka nung aten, "Nai mulungba ama Zion dang tajung inyakang; nai Yirusalem tsüki yangluang"

(T. KEN 18). Dawid pa temenen nung lurepa aluya liasü, menoktaket. Tsüngrem atalatsüba pai tsükchir ket nung agütsüya liasü. Tang Dawidi ashi, "O Tsüngrem, kodang ni temenen benshi ni lurepya liasü. Ni na mepeladaksü. Tang ni na peladaksüner. Ni na peladaksü nung ni yanglushitsü" na lureper asü yanglur?

SARASADEM:

Tsüngrem ni na peladaksür ka ama alitsü nai ni yariang. Amen

Yirusalem nung Khristanem anema inyakba menokdangteter

April 15, 2023: Yirusalem nung Arogotemi, Yirusalem yimti nung Khristanem anema inyakba Isreal sorkari menokdangteter, ta aitsü.

Yirusalem nung Arogotem aser tamangertemi, tawa Khristanem anema inyakba kanga bulua akümba ajanga yimti nung tesü nep raksatsür, ta aitsü.

Abrahamic yimsü asem amangertem- Khristan, Yihuda aser Muslim nungertem Yirusalem nung küm aika tesü nep nung dang lia aruogo, ajisüaka tawa tanü item ama tatalokba ajanga yimti nung tesü nep raksar.

Yirusalem yimti ya tamangba yimsü balala amangertem aika aliba yimti lir, aser iba yimti nung yimjung aser tesü nep alitsüji kanga tongtibang, ta aika tangatetba lir.

Israel nung yimtenren tsütsü

mepetmesü aliba aser Israeli-Palestinian raraba mapang ka nung Arogotemi sorkar tashimaitba atema aitsür.

Khristanem karibo, East Jeusalem nung Palestine nung Khristanem aser Armenia nung Khristanem arua melidaksütsü nükjidong nung Israel nung yimsü alia amangertemi asalentong yanglur inyaker asütsüa akok, ta bilemer.

Ajisüaka Israel nung Yihuda nungertem aser melungtet telok balalai Khristanem pusema Yirusalem nung yimsü ajak sadoka amangtetsü aser tekülem temeden kümzüksü melunga lir.

Taküm February aser March ita na nung Tenla kitem aser Arogo kiojentem anema inyakba tatalokba aika liasü; item tatalokba sülen Isreal police-i aibelener karbo puogo.

LOKTI YANGLUSHI SENTONG AGI



Dimapur, Rongchii/April 15 (TYO): ABAM Social Concern ajanga ayonga ABAM nung Zone 8 & 9 Arogotem nung toklanga tenzükertem asoshi "Lokti Yanglushi" sentong ka April 13 & 14, 2023 anogotem

nung Naga United Ao Baptist Arogo nung agiogo, ta ABAM Executive Secretary, Rev. Dr. Mar Pongener-i sangdong ka ajanga metetdaksü.

Sentong nung Sannükertemi anir toklanga tenzükertem Arogo

23 nungi parnok 77 arua aden.

Tanü asen tamangertem aika temesepba chiyungtsü achi ajemba ajanga lokti ajak nung timtem atokakja alima tipmedemdaksur. Ano yamaisa lira tarutsü mapang lanurtem tia

tamajungba nung alitsü ta meteta, temesepba chiyungtsü nokdangyim sayua liasü.

Iba denji külemi tzüzung ozüng memetetba ajanga ochi nisung aika koda masüba tia nung lir; item temenen nungi

kümzüka alitsü asoshi tzüzung ozüng metetyim session-a agia liasü.

Iba sentong nung shisalen sayurtemji Maong Jamir aser Taka Masa Ao na liasü.

AO OSHI ANGAZÜKDAK:
TANÜ ANGAZÜKTSÜBA OJANG



Polashi

(adv) anünglen shia (face up towards sky)

* Tambur ka ajungbena **polashia** lao.

Poli

(n) Tepo talila (buck toothed)

* **Poli** agi tejak topur majung kümdaktsür.

OLONG PAITEP # 6486

1		2		3		4		5
			6		7			
8								
					9			
		10						
11								12
				13		14		
15								
16						17		

TIPIEN

- 1. Nüji masü - (4)
- 3. Technütsüka - (6)
- 7. Aketa shirangba - (5)
- 8. Pi - (6)
- 9. Amena - (5)
- 10. Kinü - (5)
- 11. Tanang masü - (5)
- 13. Lenmang - (6)
- 15. Nübo tedi - (5)
- 16. Tuoshi - (6)
- 17. Shiruru apuba temenatsü - (4)

LANGTSÜNGLEN

- 1. Jila tulu - (5)
- 2. Sarasademdang tembang - (4)
- 4. Tarutsü indang ashirtem - (6)
- 5. Allia - (5)
- 6. Mojing - (5)
- 9. Tai inyakba metet - (5)
- 10. Medemer chijiba - (6)
- 11. Tatokba / Amadok - (5)
- 12. Anüngdang masü - (5)
- 14. Jabaso masü - (4)

OLONG PAITEP # 6485 TELANGZÜBA

TIPIEN :

- 3. Tema, 5. Tawa, 7. Aja, 8. Arok,
- 9. Jaja, 10. Ati, 11. Oru, 14. Ani,
- 15. Asangsang, 16. Asü, 17. Ama,
- 19. Asa, 21. Ayok, 22. Moatsü,
- 24. Oko, 25. Yiru, 26. Amak.

LANGTSÜNGLEN :

- 1. Tar, 2. Wako, 3. Tajü, 4. Mejang,
- 5. Taa, 6. Waitsü, 12. Rasa,
- 13. Anem, 14. Angati, 15. Asüyim,
- 17. Akok, 18. Amok, 20. Aou, 23. Aya.

KHEN SHISADANGDI

EASTER SUNDAY ATEMA ASATEPER :

- Kiningtsü** : Hai nübu dang onok Easter Sunday nüji alakteta ken atentsü sentong nung lirji, town-i tola tanak ka alitsü aluja no.
- Kinungbo** : Are onok kela sentep senjie arur masüji tanü asüng kechisa pura puchiar memetetako, saka Easter Sunday nungsa süoshi tanak agir ken atener no.
- Kiningtsü** : Nenok Sentep-i marur yur nai kechi yamai penjar tekora.
- Kinungbo** : Ya-a asü amadaki aor asünungbo kecha masü, saka Yisu shia arüba sentongsa tanak asemtsü no, ta aoksar ati.
- Kiningtsü** : Ina onok sentep tempanger Kibuba Benjong sentong lirja, Yisu nüsungtem den tatempang benjong.
- Kinungbo** : wa wa wa wa Yisu shia aruba agi alima nung alir tamanger ajak pelateper nung, nenokbo Yisu shia arur tatempang benjong alir no? Tanü asüng tamanger ya-a oda mepuratsü ajak purateter aja, linürapang kena GOOD FRIDAY sentong nung yaang agitito. Dressing room lira temelentsü bener tukuang no. Merarateper nürji oda süoshiho aliangko, saka yamaibo tera purapuchir amaia nooo.
- N Sako Imsong, 4th Mile, Diphupar

Happy Birthday

TENÜNG : PERIREN LONGCHARI

- Tasoba anogo : April 16, 2020
- Küm : Asem (3)
- Talidak : Power House
Burma Camp Dimapur.
- Küm asem tashi arishi moatsü nung Tsüngrem tenüng sanga tasoba anogo tepela salem lemsateper.
- Apao, Angao, Nori, Azüo & Awao



Arunachal nung ITBP battalion tasen 6 lemzüksütsü



Itanagar, April 15, 2023

(Agencies): Indo-Tibetan Border Police (ITBP) indang battalion tasen 6 tashi Arunachal Pradesh nung mapa lemzüksütsü.

China-i Arunachal Pradesh atsünga agitsü anema ITBP battalions mapa lemzüksütsü.

Centre sorkari ITBP battalions tasen 7 lapoktsü atema lemtetogo aser iba nungi

battalions 6 tashi Arunachal nung lemzüksütsü.

Taküm February ita Cabinet Committee on Security (CCS) ajanga battalion 7 lapoktsü lemtetba nung 9400 personnel alitsü.

China sorkari tawa tu Arunachal Pradesh nung tesem

11 nüngja melenshiba sülen India o China tsünga tekong merangtepa arur.

Anosa, Arunachal Pradesh nung arrtsülen India aser China sepaitem tsünga rarabangsentepa arur.

Yaküm December ita Tawang anasa Yangtze nung India o China sepaitem tsünga raratepa liasü.

China sepaia noklang aika India arrtsü telungi aitba ajanga telok ana tsünga teka itepa raratep.

East Khasi Hills nung anentsüh lendong nung 2 asü

Shillong, April 15, 2023

(Agencies): East Khasi Hills District kübok Rngain nung anentsüh lendong ka atalokdang nisung ana asü.

Tenaji Meghalaya kübok Wahlyngkat nunger ta

jangjaogo.

April 14 anüngdang anentsüh jagi gari ana anebanga liasü. Iba mapang lung tulu ka Wahlyngkhat nungi Rangbah Shnong

Seiborlang Jaktung indang gari madak tsük aser idangji nisung

ana asü aser 9 yiru.

Lendong ya Ryngngain anasa atalok aser Rangbah Shnong indang gari nung mena alir nisung ana asü. Teyirurtemji Pynursla Community Health Centre-i anir oa anepalu.

KCP indang 43 buba Foundation Day among

Imphal, April 15, 2023

(Agencies): Kangleipak Communist Party (KCP)-i Honibarnü 43 buba Foundation Day mongogo.

KCP ya ozüngi noktanga telungpur telok ka liraser tanü 131 battalion nung sentong tongtiba agia liasü. KCP-i Meitei sobaliba wazüka ayutsü aser India nungi Manipur balaka razüka aotsü atema noktaker.

Central Head Quarter

(CHQ), General Headquarters (GHQ), Training Centre aser tesem balala nung Tactical Units nung iba anogo mongogo ta secretary in charge, information, S Mangal-i ashi.

Iba sentong nung milen tsüklok aser wako atsüketba sülen Central committee indang annual report zünga metetdaksü.

Manipur nung lisopurtem bendangertemi atsüngdoktsüsa tia ka ajurua lir aser Myanmar

nunger aika arrtsü adena aruba ajanga lendong bentsür arur, ta KCP-i metetdaksü.

Manipur ya industry maliba state ka kümdaktsüogo aser tangar dang nungi teyari meshia agir ta parnokisa ashi.

Manipur nung drugs ajanga timtema arur aser lanur aika moko, yi aser drugs indang alar kümogo. Manipur nung poppy lu kanga ayimer aser heroin yanglur ta KCP-isa metetdaksü.

Guwahati nung feet 75 tasazük linük wako ka atsüket



Guwahati, April 15, 2023

(Agencies): Honibarnü Guwahati nung aliba Narangi Military Station nung feet 75 ka atsüketogo.

Iba wako ya General Officer Commanding-in-Chief, Eastern Command, Lt Gen R P Kalita ajanga atsüketa liasü.

Flag Foundation of India ta ser NGO kati iba wako agütsü aser Narangi Military Station indang Sainik Park nung

atsüket.

"51 Sub Area teloki iba mapa inyakba atema tenüngsang agütsür" ta Lt Gen Kalita-i ashi.

Linük wako ajanga sepaitemi tali tejangraba nung pei lemzüka mapa inyaktsü ajungmesotsü ta paisa ashi.

Iba sentong nung Flag Foundation of India CEO Maj Gen (retd) Ashim Kohli, Army aser parnok kibongtem, NCC cadets aser civilians aden.

Japan PM Kishida tepsettsü merangsang jangjaogo



Wakayama yimti nung Japan Ato Kilonser Fumio Kishida (abelen) dak achichilen alisangi timtem agütsüsü merangba sülen tangokba noksa nung angur.

Tokyo, Rongchii/April 15

(Agencies): Honibarnü Japan nung angu apuba yimti,

Wakayama nung Japan Ato Kilonser Fumio Kishida o jembitsü lia pipe-bomb mesük oset ka mereploktsüli apuba tebur ka ya Hyogo Prefecture nungi arishi küm 24 tain Ryuji Kimura ta jangjaogo.

NHK, Japan Times aser Kyodo News ajanga ashiba agi, tang tashi Kimura-i telangzüba kecha magütsür.

Byboll elections ka nung tokteptsü asoshi candidate ka atema nübu yimja Japan Ato Kilonser Fumio Kishida ya Honibarnep o jembitsü lia tube mesük centimetre 15 talang oset ka Kimura yagi mereploktsü. Osetji ka tsükli apok aser ka mapok.

Mezüng ango apur anati Kimura soit aser mapang tatsüka tsüngta police officers aser security ketdangsürtem arua iba nisungba ya ali nung nenketa ayu.

Japan indang chief cabinet secretary Hirozaku Matsuno-i ashiba agi, iba tatalokba ya tatok agütsüla masü, ta Kyodo News ajanga ashi. "Democracy atema elections ya tamendak dak lir. Tang mapang iba ama mapa

inyakba ya khenyongi tatok agütsüla masü," ta Matsuno-i ashi.

Temolung melemi alisang tebilemba asüngdangyar aser National Police Agency dang VIPs tem kimzüka ayutsü ajungshir, ta pai ashi.

Anepdang 11:25 ako (par mapang) meta Kishida-i arua jembitsü alidak nisung noklang ishika adenshia alidak nungi oset ya mereploktsü, ta Kyodo News ajanga ashi.

Ibo mapang ola tulu adoka apok aser nüburtem tetsübo nung jena ao. BNONews ajanga video ka sayuba nung apokba sülen mokozü tilaka adoka liasü.

Nisung ka ali nung melangketer second ter shi lir ola tuluka adoka apokba angashi. Ibo tesem ya kanga süngjemer, kechiaser ibai angopur rong anenba tesem ka lir aser nüburtem tsübotep, ta yangji alir kati Kyodo News dang ashi.

Nisung yiruba osangbo mali aser idangiisa fire trucks tem arua liasü.

Japan ato kilonser ya pa anüker sepaitemi metre ter shi pilar anena aliba gari kati anir ao. Parnoki pa Wakayama

prefectural police indang headquarters-i anir ao.

Nikongdang Kishida ya Chiba Prefecture kübok Urayasu aser Ichikawa tesem nung o jembitsü lir aser ano Deobarnü Oita Prefecture-i pa aotsü.

"Nenok ajak den külemi asenoki election maparen inyaktüsü. Ibo tatalokba yagi election inyakyim nung meinprong mesüdaktsüla, ta Kishida-i ashi.

Parliamentary election ka atema nübuyimba mapang July ita taoba Ato Kilonser Shinzo Abe tepseter ita toku dang lir iba lendong ya ataloker, koba ajanga linük anokshitsü aser iba yongji police tekolakpor aika mapa nungi anena liasü.

Ajidang masü ano linük south tsütsü Hiroshima yimti nung May 19-21 anogotem Kishida-i Group of Seven (G7) ministerial senden ayongzüka lia iba lendong ya ataloker.

Unification Church ka den sendaktepa aliba mechi tenük yok, ta Abe tepsetsang Tetsuya Yamagami-i ashi aser iba yongji iba telok aser Japan nunger yimten yimsüsür tsüngta tesendaktep aliba temai adoka liasü.

Sudan nung army aser paramilitary force tsüngta rarar

Khartoum, Rongchii/April 15 (Agencies): Sudan paramilitary aser linük indang army tsüngta anogo ishika tensa mejungi arur linük yimtiba, Khartoum nung prangbong aser tapokba ola angashir.

Civilian tem nem yimsü südaktsüsü asoshi sentong yangluba dak sendakba nung ajemdaker mangatetep ya adok.

Yimti tiyong nung army indang headquarters anasa prangbong ola angashir ta osangbener temi ashir.

Paramilitary Rapid Support Forces (RSF) temi airport aser tir aliba ki agiogo ta ashir.

Ajisüaka item osang ya mejangjateter.

Khartoum south tsütsü parnok indang camp ka amak, ta RSF ajanga shia liasü.

Külen army temi ashiba agi, RSF temi mitkar indang headquarters sabangtsü meranger.

"Rapid Support Forces nungi züngsem temi Khartoum aser ano Sudan nung aliba army camp aika amak," ta army odongtar Brig Gen Nabil Abdallah-i ashi.

"Rara manener aser army temi pei duty inyaka linük kumzüka ayutsü meranger."

Merowe yimti nunga khatapa liasü, ta tenük kuli alirtemi osangbener dang ashi.

Yangji military camp ka nungi mokozü adokba noksa tem Alarabyia TV ajanga saya liasü.

2021 küm October ita sepaitemi tashiyim amshia sorkar atsüngdokba sülen sepaitemi tanishir temi Sovereign Council ajanga linük nung yimsü süa arur.

RSF ya iba council indang vice-president Gen Mohamed Hamdan Dagalo lenisüba kübok

lir. Külen army ya Gen Abdel Fattah al-Burhan-i anir lir, shiba Sovereign Council indang tekolakba lir.

RSF züngsemtem linük indang army nung anioktsü asoshi mapang latetba dak sendakba nung civilian-i aniba sorkar kumtetsü maparen nung tetsükdaktsü ajuru.

RSF temi küm ter tashi menudaktsüner saka army temi küm ana tsüngta civilian nem sorkar tentetsü tashi agütsüsü ashir.

Tan hopta tensa tamajungba kumer lia RSF temi Merowe nung mitkar amenoka aliba tesemi par züngsemtem Brehostibarnü yoka liasü.

Civilian sorkar nung ka kuma lungjemba army shiba nem anidaktsüsü ta asüba angateteptsü asoshi pa ten atongba (second in command) den jembitsü molunga lir, ta Gen Burhan-i ashir.

Anüolen tashi tait linüktem aser region nung lenirtemi telok ana tsüngta tensa azioktsü aser civilian nem yimsü südaktsüsü asoshi jembishinüang ta ajungshir.

2021 küm sepaitemi tashiyim amshia sorkar atsüngdokba ajanga mitkar aser civilian lenirtem tsüngta tashi lemsar küm ana dak tema yimsü süa aruba tatembang kati aru. Ibaji dangar asoshi meblemi mapang talangka yimsü süa arudang Tir Omar al-Bashir atsüngdokba sülen mitkar aser civilian tsüngta tashi lemsar yimsü asütsü pangjema liasü.

Sepaitemi tashiyim amshia sorkar atsüngdokba sülen Khartoum nung mapang shia democracy khanga longkak aita arua liasü.

Imran Khan-i Eid sülen longkak aittsü sangdongogo

Lahore, Rongchii/April 15 (Agencies): Sorkar anema aser judiciary bukumba sayua Eid sülen ni anir yimjung nung longkak aitba sentong ka tenzüksü, ta Pakistan Tehreek-e-Insaf (PTI) tekolakba Imran Khan-i Hukulbar aonung sangdonga liasü.

Election nung tokteptsü asoshi tsübodaktsüsü mechi tashi nung aliba telok temi Zaman Park amaktsü aser parnoki akok tashi nisung aika aputsü sentong lir, ta taoba ato kilonseri ashi.

"Par sentongji 27th Ramadan sülen parnoki ano Zaman Park amaktsü aser election nung tokteptsü tsübodaktsüsü mechi nüburtem aika aputsü merangtsü," ta pai ashi.

Pai police temi tashiyim amshiba indanga tuteta jembi aser police temi PTI lenir Shahbaz Gill reshikangshia amshi ta tai tongloktsü.

"Gill ya mangsa langkoshishi sendaka ayu aser tanü tashi pa junga taneptsü monguteti lir. Police station ka nung aliba police tashishir tasen kati tali reshikangshir," ta Imran Khan-i ashi.

"Iba tensa reprangtsü atema

ni General Bajwa aser tang aliba Army Chief nem osang agütsüogo. Supreme Court nung telemsa adokdaktsüsü meranger. Parnoki merangra ni ano yimtung nung longkak ait tenzüksü. Ni anir longkak aittsü," ta taoba ato kilonseri ashi.

Caretaker sorkar ka teinyaktsü ajak agi elections agitsüba dang liasü, ta pai ashi.

"Tanü tashinung police temi party pur 3000 shi puogo saka linük nung police temi PMLN nungi züngsem kata pua mali. Pakistan Muslim League (N) nem takok ngudaktsüsü asoshi tentet ajaki yarir," ta Imran Khan-i aittsü.

Party worker temolung ajemdaktsüsü mechi Ali Amin, Iftikhar Ghuman, Shahid Hussain, Azhar Mishwani aser ano aika puogo, ta Khan-i ashi.

Khan-isa par sorkaribo tang ama nüburtem ajemreptsü merangba khenyongi magizüktsü aser ochimashi mapa inyaker nem tatok magütsüsü, ta ashi.

Democracy yimya nung yimsü asüba aginer telok ajak dang Democracy asoshi pai anir raba nung nokdaktsü ayongzüka liasü.



Police nem mepudaktsüsü meranga jenshia senzür shishilempar Mehul Choksi ya linük nung bank nung ashikülak mapa tulutiba inyaba mechi India sorkari bushir. Ajisüaka Antigua and Barbuda nung court kati iba ken o mechi Mehul Choksi ya linük nungi memeindoktetsü, ta obendang agüja liasü. Pa meimchir memesük reshikangshia amshi ta Choksi-i Hukulbarnü ken o benokba mechi Attorney General of Antigua aser police dang pa reshikangshia amshiba tejanga bushisüngdangtsü tuyua liasü.

4BUBA MOKOKCHUNG INTER WARD FOOTBALL TOURNAMENT Quarter Final April 17 nü asayatsü



4 Buba Mokokchung Inter Ward Football Tournament tatembangbuba league asaya anogo Majakong Ward aser Kumlong Ward tsüngda asayadang tangokba noksa.

Mokokchung, Rongchii/ April 15(TYO) : 4 Buba Mokokchung Inter Ward Football Tournament tatembangbuba league ana asaya aser Match tanu mezüngbuba asaya Majakong Ward aser Kumlong Ward tsüngda asayaba nung Majakong Ward-i goal 1-0 agi Kumlong kokteta Quarter Final asayatsü maongka ngutet aser tanabuba asaya Tongdentsüyong Ward aser Yimyu Ward tena tsüngda asaya nung Tongdentsüyong Ward-i goal 4-2 agi Yimyu Ward kokteta Quarter Final asayatsü maongka ngutet.

Majakong Ward aser Kumlong Ward tsüngda tanu asoshi mezüngbuba asaya nung asaya tenzüker minute 9 buba nung Majakong Ward nungi jersey No. 7 Putimeren-i goal 1 yoka iba goal jagi Majakong Ward puri Kumlong Ward

kokteta par ward Quarter Final asayatsü maoangka ngutet. Iba asaya nung Kumlong ward pur asayartemi tatembang tashi kanga dang meranga asayadang saka parnoki maongkaji magiteti iba asaya tembang.

Tanu tanabuba asaya Tongdentsüyong Ward aser aser Yimyu Ward tsüngda asaya nung minute 12 buba nung Tongdentsüyong Ward nungi jersey No 11 Wapongtemjen-i goal 1 yok aser iba sülen asaya aoba mapang minute 14 buba nung Yimyu Ward nungi jersey No 16 Maongonen-i goal 1 yoka kasasa akum, saka minute 21 buba nung Tongdentsüyong Ward nungi jersey No 11 Wapongtemjen-i tanabuba goal 1 yok aser par telok takoklen akum.

Maneni asayayonga aoba mapang nung Tongdentsüyong Ward nungi jersey No 7 Tarepnungsang-i minute 29 buba nung goal 1 yok aser ano minute

39 buba nung jersey No 10 Opanglemzüng-i tanabuba goal 1 yok aser asayji 3-1 ta akum, saka ano minute 14 buba nung Yimyu Ward nungi jersey No 20 Maongonen-i goal 1 yokteta iba asaya Tongdentsüyong Ward-i 4-2 agi Yimyu Ward kokteta Quarter Final asayatsü maoangka ajanzüktet. Iba asaya nung asaya tenzüker minute 9 buba nung Yimyu Ward nungi jersey No 16 Maongonen Yellow card ka angu.

4th Mokokchung Inter Ward Football Tournament Quarter Final Matches

17 APRIL, 2023

1st Match (11:00 am)

Mongsenbai Ward Vs Penli Ward

2nd Match (12:30pm)

Majakong Ward Vs

Tongdentsüyong Ward

3rd Match (2:00pm)

Artang Ward Vs Arkong Ward

4th Match (3:30pm)

Sangtemla Ward Vs Lijaba Lijen

Ward

Dimapur nung Dr. N Yhome Memorial Tennis Cup temogo



Dimapur, Rongchii/April 15 (TYO): Kuda village, Dimapur nung aliba Chavino Peseyie Memorial indoor stadium nung Honibarnü 2 buba Dr. Savizo N Yhome Memorial Tennis Cup asayaba nung Nagaland nungi tennis asayar tajung Vilasier Khate-i tebur kija asaya final nung Iceiraibe madak takok ngua liasü.

Tebor tarep asaya nung Vilasier Khate aser Thejasier Khate nati Vikhozolite aser Kikhriesetuo Sekhose madak

takok angu aser tarep temeyoktep asaya nung Vilasier Khate aser Sentinaro nati Thejasier Khate aser Catharine Walsh madak takok ngua liasü.

Veterans Doubles nung Kikhriesetuo Sekhose aser Lhokishe Awomi nati Shikeye aser Rishi Chakraborty madak takok ngua liasü.

Iba asayamung tembangba sentong nung jembidang Nagaland Tennis Association tir aser Ex- MP, C Apok Jamir-

i ashiba agi, saisapong ya ajak atema lir aser tesem balala nungi iba asayamung nung shilem agiba ngua tennis ya nüngtugu asaya ka ta sayur.

Iba asayamung takok ngua katetba ajanga national aser international sapang nung shilem agitsü lanur tajung adoktsü imlar, ta pai ashi.

Paisa takok angur ajak nem tenüngsang agütsü aser tamakok angurtem dang takok angutsü maongka aika lir ta shia liasü.

6 buba Open Air Rifle Shooting Tournament osang

Kohima, Rongchii/April 15 (TYO): Kohima District Rifle Association ajanga Honibarnü Pele Khezhe Indoor Stadium, Kohima nung ayongzükba 6 buba Open Air Rifle Shooting Tournament nung Yimyakumla, Neizo Belho aser Echen Amer nung temi temaba jenjang tongteta liasü.

Iba asayamung event asem lemsar agi aser yangji takok angurtem yamai alitsü:

PCP (Pre-Charged Pneumatic): 1st - Yimyakumla (180 points), 2nd - Tatongnenla Lemtur (165 points) aser 3rd - Temjensoba Lemtur (141 points).

Break Barrel: 1st - Neizo Belho (111 points), 2nd - Thepfuvikho Kuotsu (101 points) aser 3rd - Visabei Kire (100 points).

25m Bench Rest: 1st - Echen Amer (236 points), 2nd - Menuobeilie Yiese (234 points) aser 3rd - Ketoukhriezo Whuorie (219 points).

Iba asayamung tenzüka sentong nung special guest ka ama jembidang MLA Dr Tseilhoutuo Rhutso (Ato)-i ashiba agi, national aser international jenjang nung asaya

aika nung temang anema aser tashi ita alitsü nüngdaker, saka danga saisapong nung ama Naga nung shooting event nung tasodang nungi sempet keter asor.

Tejangrartem asoshi KDRA ajanga sapang agütsüba asoshi pelaba lemsatep aser iba ya lanurtem asoshi career guidance ka lir, ta pai ashi. Iba dak sendakba nung pai asaya nung shilem agirtem dang meranga inyaksü aser bendanga agüja rifle sports nung national aser international level nung tokteptsü ayongzüka liasü.

Kohima Town indang MLA ka asünung, Dr Ato-i saisapong terenlok aser lanur sempet alirtem temaba jenjangi ajungketsü asoshi akok tashi yariteptsü shia liasü.

Asayamung tenzüka sentong nung KDRA tir Visasielie Suohu menden liasü aser Assistant Pastor, Baptist Mission Church Kohima, Menuolhoulie Sekhose-i sentong tenzüka sarasadema liasü.

Asayamung tembangba sentong KDRA patron Pele Khezhe-i moatsü aser takok angur nema pai sempet agüja liasü.

Manchester United alitsü tejangraba mesamai lir: Thomas Zilliacus

London, Rongchii/April 15 (Agencies): Thomas Zilliacus-i tang tashi Manchester United alitsü tejangraba lir ta ashi aser Glazer family dang iba club atema jenjang atettsü ayongzüka liasü.

Glazers ajanga tan hopta bidding round tasembuba agitsü telemetba agia liasü.

Finland nungi shishilempar Zilliacus-i social media nung ashiba agi, pa iba sentong nung sholem magitsü.

Zilliacus-i BBC Sports dang pa iba bid nung khenyongi shilem magitsü saka tanaben bid asübabo memelenshi lir, ta ashi.

"Ni taoba mapang agütsüba maongka tang tashi lir aser ni agüja aliba dang timba agütsütsü molunga lir," ta pai ashi.

"Ni round tasembuba nung shilem magitsü, kechiaser ibai tim masü amai ajiteter. Tazüngla ka nungi round tasembuba ya kechiba tenzüker, ni kuli kecha monguteter."

"Ibai khenyongi balaka amai ajiteter, ayoktsü molunga lira aser taliner asem lira, kechiba parnok den mener jembishinü masür," ta pai ashi.

Taoba ita Old Trafford club ya alitsü atema Qatari banker Sheikh Jassim bin Hamad Al Thani aser Ineos kibur Sir Jim Ratcliffe natia bid tanabuba agüja liasü.

Glazer family ajanga iba club ya 2005 küm sen million £790 agi alizüka liasü aser parnoki November ita ayoktsü bilemer, ta sangdonga liasü aser iba club

jenjang sen billion £5-6 asütsü ta asadangteta lir.

Tang iba club ayoktsüba tsütsü mangatetep adoka aliba ajanga manager Erik ten Hag indang summer squad sentong nung tetsükdaktsü ajurutsü akok ta Manchester United Supporters Trust ajanga ashiba arishi küm 69 tain Zilliacus-ia shidaka ta ashir.

"Glazers temi asayar tasen dak sen aika indoka mangur. Parnoki club ya ayoktsü lemteter asünungbo parnoki kechiba yamaji inyaksü? Club akoksatsü ya lenmang tuluka lir aser telemetba ka magir asünung iba lenmangji anogoshi tuluba akumer," ta pai ashi.

Taoba mapang Finland nung tajungtiba club, HJK Helsinki indang menden inyaksangisa Euro 2028 mapang asayatsü asoshi Football Association ajanga asayaba tesemtem agütsüba stadiums list nung Old Trafford madenba yong aoksar, ta ashi.

Tawa iba asayadak sen ajema indokba mechi Old Trafford ya mapang shidak nung tembangtsü ta United-i meshiteter aser ano külen kibur akumtsü asoshi tejangja ka monguteti lir.

"Nisung timba England nung stadium asem tenüng dang meteta lir - Old Trafford, Wembley aser Anfield. Item stadium ji reprangi kisünga nisungtem arur. Old Trafford mezüngsemba ya maksü lir," ta Zilliacus-i ashi.

BILEMDANGANG

"Nüdak nungi adokba tesangwa dangari meremseptet."